

- केन्द्र सरकार कह्यो—देश मांय शक्कर रो पर्याप्त स्टॉक—वाज़िब दाम माथे चीनी मुहैया करावण सारू सगळा जरूरी जतन कर्या जा रह्या है।
- प्रधानमंत्री जन-धन योजना रा तैत हाल ताई 59 करोड़ ऊँ बत्ता बैंक खाता खोली ज्या।
- राज्य मांय चौमासा री मौजूदा रूत मांय हाल ताई 21 ज़िलां मांय सामान्य बरसात—राजधानी जयपुर समेत 17 ज़िलां मांय सामान्य ऊँ कम पाणी बरस्यो।
- प्रदेश मांय राखी रे मौके रौनक अर उमाव।

000

केन्द्र सरकार कह्यो है के देश मांय शक्कर री कोई कमी नीं है अर उचित मोल माथे जरूरी तादाद मांय चीनी मुहैया करावण सारू सगळा जरूरी जतन कर्या जावेला। उपभोक्ता कार्य मंत्रालय रे मुजब सरकार देश मांय चीनी री कीमतां अर स्टॉक माथे करड़ी निजर राख रही है। ई बीचे खुदरा बाज़ार मांय शक्कर रो मोल कम व्हेवण लाग्यो है। मंत्रालय रे मुजब सरकार चीनी री उपलब्धता तैय करण सारू मौजूदा मासिक कोटा प्रणाली री बजाए आवता महीना ऊँ हर पखवाड़ा मांय चीनी आवंटन रो सिस्टम सरू करण रो फैसलो कीनो है। ध्यानजोग है के 15 अक्टूबर ऊँ सरू व्हेवण वाळा नुवा पिराई सीज़न मांय 10 लाख टन ऊँ बत्ती शक्कर बणवा रा आसार है। चीनी मिलां ने अक्टूबर महीना मांय बणायी ज्यी शक्कर बिना रोक-टोक बेचण री मंजूरी दी जावेला।

000

प्रधानमंत्री नरेन्द्र मोदी कह्यो है के लारला 12 साल मांय **जन-धन योजना** रो बदलाव लावण वाळो असर निज़र आयो। वे सोशल मीडिया पोस्ट रे जरिये कह्यो के आ योजना, वित्तीय समावेशन ने बधावो देवण अर जनता ने सक्षम बणावण मांय खास काम कर रही है। ई योजना रा तैत हाल ताई 59 करोड़ ऊँ बत्ता बैंक खाता खोल दिया ज्या है, ज्यां मांय करीब 3 लाख 17 हजार करोड़ रुपया जमा करायी ज्या है। प्रधानमंत्री जन-धन योजना रा तैत खोली ज्या खातां मांय ऊँ आधा ऊँ बत्ता महिलावां रा है। प्रधानमंत्री जन-धन योजना साल 2014 मांय आज ही ही री तारीख ने सरू करी ज्यी ही। प्रधानमंत्री कह्यो के आ योजना लोगां री बैंकिंग सेवावां ताई पहुंच आसान बणा रही है।

वित्त मंत्रालय रे मुजब प्रधानमंत्री जन-धन योजना रा तैत 78 फीसदी बैंक खाता गांवाई अर अर्द्ध-शहरी हलकां मांय खोली ज्या है। सेन्ट्रल बैंक ऑफ इण्डिया रा कार्यकारी निदेशक महेन्द्र दोहरे बतायो के प्रधानमंत्री जन धन योजना रा तैत जीरो बैलेंस बैंक खाता रो सुबीतो मिलण सागे 2 लाख रुपया ताई रो दुर्घटना बीमा कवर ई मुहैया करायो जावे है। वे बतायो के बिना किसी बिचौलिया रे सीधा फायदो लेवण वाळां रा बैंक खातां मांय सीधे रकम भेजणो ई योजनां री सब ऊँ मोटी उपलब्धि है।

000

प्रधानमंत्री नरेन्द्र मोदी काल उज़्बेकिस्तान यात्रा सारू रवाना व्हेला। उज़्बेकिस्तान रा राष्ट्रपति शफकत मिर्जियोयेफ रा रा न्यौता पाछे व्हे रही दो दिन री ई यात्रा रे दौरान प्रधानमंत्री ताशकंद रो दौरो करेला। ई दौरान दोन्यू देशां बीचे रणनीतिक साझेदारी ने और मजबूत करण रा बारा मांय विचार कर्यो जावेला।

000

प्रधानमंत्री नरेन्द्र मोदी 30 अगस्त दीतवार ने आकाशवाणी ऊँ प्रसारित कर्या जावण वाळा खास कार्यक्रम “मन की बात” मांय विचार बतावेला। आ हर महीना प्रसारित कर्या जावण वाळा ई कार्यक्रम री 137वीं कड़ी व्हेला। ओ कार्यक्रम आकाशवाणी अर दूरदर्शन रा सगळा चैनलां, आकाशवाणी समाचार री वेबसाइट अर न्यूज़ ऑन ए.आई.आर. मोबाइल ऐप माथे प्रसारित कर्यो जावेला। ई सागे ई एआईआर न्यूज़, डीडी न्यूज़, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई इण रो प्रसारण कर्यो जावेला।

000

प्रदेश मांय चौमासा री ई रूत मांय हाल ताई सामान्य ऊँ 16 फीसदी कम मेह बरस्यो है। अजमेर, बीकानेर, बूंदी, सीकर, चूरू, जोधपुर अर कोटा समेत 21 जिला मांय सामान्य बरसात व्ही, जद के जयपुर, जैसलमेर, सवाईमाधोपुर, टोंक अर उदयपुर समेत 17 जिलां मांय सामान्य ऊँ कम बारिश व्ही। भरतपुर, डीग अर फलौदी मांय सामान्य ऊँ बत्ती बिरखा व्ही। प्रदेश रा 693 छोटा-मोटा बंधां मांय ऊँ 439 थोड़ा-घणा भर्या है जद के 55 बांध लबालब भर गया है। ई बीचे घणखर ठौड़ां एक सप्ताह ताई चौमासा री बिरखा मंदी पड़बा रा आसार है, हालांकि काल उदयपुर संभाग मांय कटे-कटे हल्की बरसात व्हे सके है। बिरखा मांय 4 सितम्बर ऊँ ओजू तेज़ी आवण री संभावना है। चौमासा री बिरखा मंदी पड़ जावण ऊँ गर्मी अर उमस रो असर बधबा लाग्यो है। श्रीगंगानगर मांय लारला तीन-चार दिन ऊँ दिन री बगत पारो 40 डिग्री सेल्सियस ऊँ ऊँचो दर्ज कर्यो जा रह्यो है।

000

प्रदेश मांय एक राज्य-एक चुनाव रा तैत आवता महीना व्हेवण वाळा नगरीय निकाय चुनाव री सरगर्मियां बध गयी है। भाजपा अर कांग्रेस समेत न्यारी-न्यारी पार्टियां मांय उम्मीदवारां रा नाम माथे विचार करण रो काम चाल रह्यो है अर उम्मीदवारां रा नाम तैय करण सारू मीटिंग राख्यी जा रही है। भारत आदिवासी पार्टी, आरएलपी, बीएसपी, आप अर आरएलडी ई आप-आप रा असर वाळा हलकां मांय उम्मीदवार खड़ा कर र मुकाबला त्रिकोणीय बणावण मांय लाग्योड़ी है। 309 स्थानीय निकायां रा चुनाव सारू हाल ताई 1055 पर्चा दाखिल करी ज्या है। उम्मीदवारां सारू 30 तारीख ने दीतवार री छुट्टी ने छोड़ र पर्चा दाखिल करण सारू अब दो दिन और बचा है। ई बीच, राज्य निर्वाचन आयोग रा कर्मचारी ई चुनाव री तैयारियां पूरी करण मांय लाग्योड़ा है। राज्य निर्वाचन आयोग 9 अर 11 सितम्बर ने पड़बा वाळा वोटों सारू संबंधित हलकां मांय मतदान वाळा दिन छुट्टी रो ऐलाण कीनो है।

000

प्रदेशभर मांय आज राखी रो पर्व उमाव सागे मणायी ज्यो। भाई-बहन रा प्रेम रा प्रतीक ई पर्व रे मौके बहनां भाइयां री कलाई माथे राखी बांध र वां री सुख-समृद्धि अर लम्बी उम्र री कामना कीनी जद के भाई बहनां री रक्षा रो संकल्प लेता थकां वां ने उपहार दीना।

सावणी पुण्यू ने मणायी जावण वाळा ई पर्व सारू हर उम्र रा लोगां मांय उमाव निजर आयो। बहनां भाइयां रे तिलक लगा र मुंह मीठो करायो। शेखावाटी अंचल मांय देश री हिफाजत करतां शहीद व्हा भाईयां री मूरत माथे राखी बांधण री रीत है। हर साल मोटी तादाद मांय महिलावां शहीदां री मूरत रे राखी बांध र वां ने नमन करे है। चूरू, झुंझुनू अर सीकर मांय केई ठौड़ां शहीदां री मूरत रे राखियां बांधी ज्यी। केई बहनां जेल मांय बंद भाइयां रे राखी बांधण सारू कैदखाना मांय पूगी। श्रीगंगानगर, बाड़मेर अर जैसलमेर मांय पाकिस्तान ऊँ लाग्योड़ी सरहद माथे तैनात बी.एस.एफ. रा जवानां री कलाई माथे स्कूली टाबरियां, महिलावां अर सामाजिक संगठनां री ओर ऊँ राखी बांधी ज्यी। प्रदेश रा आदिवासी अंचलां मांय ई राखी री खासी रौनक निजर आयी। सिरोही जिला मांय सैर-सपाटा री पहाड़ी ठौड़ आबूराज मांय सैलानियां री मोटी तादाद पूगी। गुजरात समेत दूजा राज्यां ऊँ आया सैलाणियां ऊँ बाजारां मांय चहल-पहल है। राखी रे मौके रेलवे टेशनां अर बस स्टैण्ड माथे ई मोटी तादाद मांय लोग निजर आया। राखी रे मौके राजस्थान रोड़वेज री बसां मांय मुफ्त सफर रा सुबीता रो मोटी तादाद मांय महिलावां फायदो उठा रही है। ई बीचे सावण महीना रा आखिरी दिन आज भगत भोलेनाथ रो अभिषेक कर र सुख-शांति री कामना कीनी। दूजी कानी हनुमानगढ़ जिला रो नामी गोगामेड़ी मेळो झण्डो चढावण री रीत सागे आज सरू व्ह्यो। आज सावणी पुण्यू ने संस्कृत दिवस ई मणायी ज्यो। ई मौके न्यारा-न्यारा संस्थानां मांय सांस्कृतिक कार्यक्रम राख्यी ज्या। मुख्यमंत्री भजनलाल शर्मा नुवी पीढ़ी ऊँ संस्कृत भाषा ने बधावो देवण री अरज कीनी है। वे संस्कृत ने भारत री ज्ञान परम्परा अर विरासत रो खास हिस्सो बतायो।

000

हॉकी रा जादूगर कह्या जावण वाळा मेजर ध्यानचंद री जयंती काल राष्ट्रीय खेल दिवस रा तौर ऊँ मणायी जावेला। देश मांय खेल संस्कृति ने बधावो देवण सारू आज तीन दिन रो अभियान सरू करी ज्यो। राष्ट्रीय खेल दिवस री थीम खेलेगा भारत, जीतेगा भारत राख्यी ज्यी है।

000